

## 開放文學－歷代筆記－夷堅乙志 卷第五

司命真君 餘嗣、字昭祖、福州羅源人。官朝散郎。紹興十八年。居鄉里。與福帥薛直老。有同年進士之好。丐部銀綱往行在。欲覬賞典。合年勞。遷兩秩。明年郊祀恩任子。九月五日。至郡中。館於所親林氏。十九日。往大中寺。飲於表弟韓知剛岳家。歸時已二鼓。倦甚就枕。月色甚明。似夢非夢。見一人排闥而入。道衣小冠。持旌幢。立於床前。呼曰。司命真君相召。嗣索所逮符檄。曰。面奉嚴旨。並無文書嗣即起。著紫窄衫。繫帶而出。回視己身。臥榻如故。歎曰。吾必死矣。逆旅中至此。為之奈何。追者前導。常遠數步。欲與之語。不可得。才出東門。覺非平日所行路。夾道高木。陰森蔽虧。日色晃曜。乃似辰巳間。經五六里許。不逢行人。心甚怖。俄見一城巍然。門旁兩人對立。軟巾束帶。如唐人衣冠。追者曰。真君門下引進使者。在此相候。可進矣。二使揖入門。門內有亭。供張甚盛。一人華冠螺髻。衣紅綉袈裟。嗣升亭。二使俱坐。不交一談。飲湯而退。復引入。度行三四里。所過金碧輝映。地皆琉璃。私喜知決非惡地。憂心稍釋。入轉一曲角。舍宇益雄麗。使者曰。此真官治事所也。嗣問曰。若至彼。用何禮以見。曰。公無朝服。只合肅揖。聞呼即登殿。入門。揭金書牌曰。司命真官之殿。如儀以謁。即引上。視真官冠服。與今朝服等。熟視之。蓋建炎間越州同官某也。嗣不欲言之。或云張讀聖行也。笑謂嗣曰。此間今年考校。得二十人。見公姓名。特去相召。嗣皇恐謝曰。嗣官卑材下。無寸長可紀。安得預考校之列。真官厲聲曰。此間不問人貴賤。不問官尊卑。但看一念之間正不正爾。與公有舊。欲公知前程事。公官資盡有。而所享之壽。止七十四。若能辭榮納祿。可延一紀。自此以往。積功累行。又有乘除。所得之數。蓋不止此。公欲之乎。嗣曰。敢不聽命。真官曰。今日非奏過天曹主宰。亦召公不得。然不可過三時。宜速歸。顧二使令引出。遂退。由元路行。經一殿門。聞人聲嘈嘈。有呻吟號泣者。使者曰。司過真君殿也。方坐殿訊囚。嗣問曰。人世何事為重罪。曰。不孝為大。欺詐次之。殺生又次之。及外門。花冠者出。向嗣合爪曰。此官員不可思議。吾到此半年。見多少人入來。何嘗有出去者。此官員實是不可思議。復揖坐飲湯下階。使者曰。尋常只到此。以公與真官有分。且又慈仁。今特遠相送。既出。嗣問曰。適花冠者何人。曰。渠是三十三天上人。以微過謫監門。滿一年。即復歸矣。所飲何湯。曰。入時是醞醞。出時為甘露。嗣懇曰。今幸得歸。何以見教。曰。輒有厭禳之術。公到家日。取門上桃符。親用利刃斫碎。以淨籃貯之。至夕二更。令人去家一里外。於東南方穴地三尺埋之。此人出。公即靜坐冥心咒曰。天皇地皇。三綱五常。急急如律令。俟其還乃止。又云。公歸家。食當異席。寢當異被。食當祭先。寢當存息。皆修持之要。嗣曰。此行念無以報德。使者何所須。二人相視而笑。掉頭曰。此中無用。此中無用。固問之。曰。公平日誦金剛經。回向一兩卷足矣。往來酬答唯一人。其一默不語。又行一二里辭去。曰。此去無他歧徑。歸即至。嗣獨行。如及城東門。足跌而寤。已三更矣。儼如白晝出謁之狀。遂呼僕張燈。作辭綱札子。遲明。詣薛白之。且言欲致仕。洎還家。取桃符。如所教以行。然不曉何理也。竟自列掛冠。明年拜命。始為人道其始末如此。且自作記。人謂嗣必享上壽。福未艾也。然是後七年而卒。殊與所夢不侔雲。

劉子昂

紹興三十二年。劉子昂為和州守。方淮上亂定。獨身之官。他日見好婦人。出入郡舍。意惑之。招與合。曆數月久。因詣天慶觀觀謁。有老道士請問。曰。使君不挈家。而神色枯槁驚黑。殆有妖氣如何。劉初諱不答。再三言之。乃以買妾對。道士曰。非人也。將不可治。今以二符相與。逮夜宜懸於戶外。渠當不敢入。劉以符歸。夜未半。婦人至。怒罵曰。相待如夫婦。何物道士乃爾。吾去即去。無憶我。劉不能割愛。亟起取符壞之。終不寤生人何以畏符。復綢繆如初。又數日。道士入府問訊。望見劉。驚惋曰。弗活矣。奈何奈何。然當令使君見之。命取水數十擔覆於堂。其一隅方五六尺許。水至即乾。掘之。但巨屍偃然於地。略無棺衾之屬。僵而不損。劉審視。蓋所偶婦人也。大惡之。不旬日而殂。王嘉叟說。得之於韓璣之子季明。

梓潼夢

梓潼神夢之靈。前志已載矣。成都人羅彥國。累試不第。既四舉。齋戒乞夢。夢蔡魯公謂曰。已奏除公樞密直學士矣。次年省試又下。乃以累舉恩。得密州文學。犀浦人邵允蹈。紹興七年被鄉薦。亦乞夢於神。夢神告曰。已與卿安排甲門高第矣。及類試。果為第一。乃刻石紀於廟西廡。後罷眉州幕官。赴調臨安。舟行至閘口鎮。病死。始驗甲門之語。蓋閘字也。

張九罔人田

廣都人張九。典同姓人田宅。未幾。其人欲加質。囑官僧作斷骨契以罔之。明年。又來就賣。乃出先契示之。其人抑塞不得語。徐謂之曰。願爾子孫似我欲語言而不得。灑淚而去。是年秋。張有孫。語不出而死。至冬。其子病傷寒。失音亦死。又一年。身亦如之。

宋固殺人報

成都人宋固。為縣之文學。鄉耆長有病者。困臥境上。時大觀四年。朝廷方行安濟法。若有病者。則裡正當任責。固憚於聞官。誘令過雙流縣牛飲橋。覺病者懷中有所挾。搜之得銀十餘兩。乃取之。而推墮其人橋下。戒其徒勿得言。居無何。復至前處。失腳墮水中死。其屍出下流五十里外沙磧中。與病者屍合。若相抱持者然。三事王時亨說。

張女對冥事

妻父張淵道。自兵部侍郎奉祠。寓居無錫縣南禪寺。次女已嫁梁元明。來歸寧。紹興己未正月七日。因游惠山寺。食煎餅差冷。還家心痛。至夜遂劇。正睡落枕。元明扶之起坐。但淚下不語。指其口曰。說不得問。何所見。應曰。張濕在此。濕者。淵道叔也。死於兵間。後降靈其家。雲為泰山府直符走吏。意其為祟。呼洞虛觀道士視之。道士取紙焚香作法。請家人共視。皆曰彷彿見紙上有影。如人戴襖頭者。道士曰。然則正神。非祟也。是必陰府追對事耳。書符使吞之。天明稍蘇。猶心痛。忽忽如癡。晚乃能言。始病時有持符來床下。雲官追汝。女曰。我士大夫家女子。何得輒喚。曰。陽間如此。陰府不問也。便覺身隨此人去。至寺後牆門欲出。一人長丈許。推之入。責追者曰。張侍郎小娘子。爾何人而得呼之。追者不答。則身已在牆外。有兜籬甚飾。使登焉。兩人肩舁。約行數百里。又度錢塘江。久之入一大府。朱門明煥。上施上金釘。殿屋九間皆垂簾。其中三間簾捲。王者紅袍碧玉冠。坐其上。追者前白公事到。王竦身憑案立。問曰。張相公在陝西殺趙哲。汝父為參議官。預其事否。女欲言不知。恐累父。答雲。初不預謀。亦曾諫不見聽。王曰。諫而不聽。何不去。答曰。嘗求一郡。不得請。王顧左右。令詣司供狀。方對答時。望西廡一人。側聽而笑。東廡亦有一人。皆狀貌堂堂。既詣曹。曹吏指曰。笑者乃趙哲。其東則曲端也。吏以下皆長。一丈。戴鐵襖頭。著褐布袍。具筆札。令女為狀。且曰。當追長子。以其不慧故免。蓋淵道長子通。自幼多病。不解事。俄持盤食來甚豐。或曰。不可食。食則不得歸矣。廡下各列門戶。或榜雲鑊湯地獄或榜雲剝確地獄。其室甚多。皆扁鑊。不見人。遙見故烟家宋氏母。據案相望而笑。傍人云。見判善部。須與供狀畢。王命放還。無復轎乘。獨隨追者行。及江頭。見貴人公服乘馬。導從甚盛。問人云。呂相公也。是時呂忠穆公已臥病。後一月始薨。蓋其魄兆先逝矣。

畫學生

成都郫縣人王道亨。七歲知丹青。用筆命意。已有過人處。政和中。肇置畫學。用太學法補試四方畫工。道亨首入試。試唐人詩兩句為題。曰。蝴蝶夢中家萬里。子規枝上月三更。餘人大率淺下。獨道亨作蘇屬國牧羊北海上。被覆杖節而臥。雙蝶飛舞其上。沙漠風雪羈棲愁苦之容。種種相稱。別畫林木扶疏。上有子規。月正當午。木影在地。亭樹樓觀。皆隱隱可辨。曲盡一聯之景。遂中魁選。明日進呈。徽宗奇之。擢為畫學錄。又學中嘗以六月杖藜來石路。午陰多處聽潺湲為題。餘人皆畫高木臨清溪。一客對水坐。有一工獨為長林絕壑。亂石磴道。人立於樹陰深處傾耳以聽。而水在山下。目未嘗睹也。雅得聽潺湲之意。亦占優列。

## 周勉仲

周勉仲自強為蘄州司法時·以驛舍為官廨·晚步中門外·往來微倦·顧廳側有板倚·使人取之欲坐·及其處則了無一物·宅後枕郡治之萬芝堂·堂有池·白晝見人蓬首對水坐·叱之使起·其人矍然立·背如負大甕者·躍入池中·有聲訖然·識者以為龜鱉之精雲·又嘗往廬山·與歸宗長老坐小室·見一人往來窗下·著烏巾·其身僅與窗等·訝其太短·出視之·無所見·勉仲說·

## 樹中盜物

王深之湛家臨川·每失去碗櫟瓶合·及衣服之屬·輒譴責僕婢·然不復可得·一夕暴風起·屋東大皂莢樹吹折·斷處中空·凡王氏積年所失物·皆貯其內·半壞矣·其樹·今猶在雲·郭汭潔已說·

## 扈司戶妻

洪州分寧王氏婿扈司戶·自京師買一妾·甚美·攜歸置於妻家·妻母謂人曰·扈郎妾信美·然語音僅能出口·十句只可辨一二·面目極峭冷·與人寡合·而足絕小·可藏於袴中·類非人間女子·久留不去·非扈氏福也·扈生聞之·疑其妻不能容·故母言如此·未忍決絕·妾來時以白犬自隨·行止飲食不暫舍·逮夜則寢床下·經一歲·妾入佛堂瞻禮·急大呼乞救·人往視之·則為犬齧斷一臂·臥血中死矣·犬亦繼死·李紹祖說·

## 異僧符

豫章之南數十里生米渡·幹道元年三月八日·有僧晨濟·將登岸·謂津吏曰·少頃見黃衫五人荷籠而至者·切勿使渡·渡則有奇禍至·取筆書三字·似符而非·了不可識·其文曰·■■■(車■足)■■■·以授吏·曰·必不可拒·當以此示之·語畢而去·吏不甚信也·然私怪之·至午·果有五黃衣·如府州急足者·各負兩箬籠·直前登舟·吏不許·皆怒罵·殆欲相毆擊·良久不解·吏乃取所書字示之·五人者·一見狼狽反走·轉眼失所在·委十籠於岸滸·發之·中有小棺五百具·吏焚棺而傳其符·豫章人家家圖祀之·是歲江浙多疫·唯此邦晏然·識者謂五人乃瘟部鬼也·予過江州及衢州·見土人言各不同·竟未知孰是·餘增禮說·  
李南金